

**PORI MA EFESASÍ NANIN
BANTA UVAMAN AMEIN
BOMPON MINO
(Efesasi)**

**Efesasi Vompon Ma Uvanteí
Pákenai Afova Vaya Ino**

*Ma vompon ma uvantein banta ino.
Baya varen orin banta Pori ino.*

Uvarein orana ino.
AD sikisti-tu (62) fin mi Korosí nanin bantai
vompon má Firimonini vompon má manafin
kauran baren orein mino.

Ma vompon ma uvantein baru ino.
Romú kákán barurá karavusií uran báken kar-
avusi namun pintéi uvanten mino.

Ma vompon ma uvaman amikhein kéká ino.
Efesasí ma monó nanin banta varé eimpin
mifo mai vompon mano anan Esiá barafin
ma varé ein monó namun kayofimpá deren
eúkukhen mino.

Nái ana vará ma vompon uvanten nafino.
Ena anan nanin banta finté ma monó tiyain
nana ma Esiá barafin bain Yutan kayo ano
ma oyan amen nan mino. Yutan kayo vá
ena anan kéká bápin ma ákona kafi varé
ein ma Tiyarafenu ano Karaisin tiantan ma

yoruman barákuren ma míkampin mana mununan kaen ma inká Karaisimpin ma manan mana kékásien ma ukhein nan mi ma ma minópá uvaman amikhein bompompin tian amá ukhen mino. Ma vomponi kankan saptafin mi monó tin avúavá pákena ineine amen mi inká Tiyarafenu aruvin dana san tikhan ma minó ano anunu iyain vesi va san tian amá ukhen mino. (Sapta 6:10-18 fin ná onano.)

Porini Susu Vaya Ino

¹*Yisas Karaisini kama vaya varen orin bantaí ino van ma Tiyarafenu ano vei anunurá ma aní ukhein banta séi Pori anon ma vompon uvaré uno. Efesasí ma Tiyarafenu kantá nanin banta váken Yisas Karaisintá ma mumunan ukheona kayon uvaman amé uno.

²Teti Sifóe Tiyarafenu vá inká tetisi Bafan Yisas Karaisin má anon tiretin tarisari uren ará kusin aminten mino.

Yisas Karaisin Táké Ma Kantasí Ukhein Avu Varan Baya Ino

³*Tetisi Bafan Yisas Karaisin Afóen Tiyarafenu avisá daní ó tifano. Béi anoi setin tivábá uren mi inaru fákena kama yanasantia setin timikhan mai anoi setin tú iyampon tiya iyan mino. ⁴*Mai fara vara seyo, Tiyarafenu ano ma vara ída uvanten pefái setin aní uren Yisasin má maman túpá ukharen mino. Para ya ino. Béi setin nan anunu uren mi mai avúavá mágan baren ben avorá

* **1:1:** Apo 18:19-21; 19:1 * **1:3:** Efe 2:6 * **1:4:** Yon 15:16

kantasí ukhein nanin banta ano setin nan ída aau manten mino sinten mino. ⁵ *Tiyarafenu ano Yisasin pinté uaren tetí ankan e sivían be akhasí ono van inikhen mi véin kákán amusin uanten mino. ⁶ Tiyarafenu ano ma setin tarisari urá ma ve Anin má túpá ukhé tiferuna vará ben aví daní ó tifano. ⁷ *Tiyarafenu ano Yisas Karaisin pinté uaren mi setin moéken tarisari uren beni narefó ume finté setin evaránen tivíken mino. ⁸ Tiyarafenu ano vei kama ineine vá tarisari vá tetimpin banaen mino. ⁹ *Pefá ma Tiyarafenu ano ma Yisas Karaisintái ma yaná baranté uno siren ma inian kain ma aúpá bá ein mai saréon bariyáken mi setimpin tian amá iyan mino. ¹⁰ *Mai veni ineine máan mi ukhen mino. Be ma aní ukhein damú ma afoká intin maen minó ma vara ráke yanasantá vá inaruráke yanasantá vá o éke e éke uan manafin átaru urantin maen Yisas Karaisini yafisin aránaópá anan banten mino.

¹¹ *Yisas Karaisin má ma súpá ukhé tiferuna van mi Tiyarafenu ano setin nan bei vanasi ino sen aní ukhen mino. Máan tukhantíi Tiyarafenu ano ma fefá iyátintákáré ein danasinta vará tifanté uno. ¹² Tiyarafenu ano ma máan tein mai seti Yutan nanin banta ano ma Yisas Karaisimpin naren ma ákoná inin ma ave ukhé tiferuna kéká ano Tiyarafenu aví daní iyan kákán bí amino van mino. ¹³ Tireti ena anan nanin banta ano Yisasini fura vaya vá kama vaya vá inire mumunan e ono. Máan ma eona anon

* **1:5:** Yon 1:12 * **1:7:** Efe 2:7; Kor 1:14 * **1:9:** Rom 16:25

* **1:10:** Kor 1:16, 20 * **1:11:** Rom 8:28-29

tiretin aya uran mi Tiyarafenu ano seti Yutan kayo ma einién tiretin avían Yisasin má túpá en mino. Máan turen mi vei vanasi ma ameno van iyáantán baré ein Kantá Aunan ma siren amein manon beni vanasi ino sen aní ukhen mino. ¹⁴*Tetí ankan ma Tiyarafenu ano iyátintán bain danasinta ma ínaiimpá baranunai fura sen Kantá Aunampó tetimpin aní ukhen mino. Mai vará tetí ankan kakhakein Tiyarafenu aví daní ó tifano.

Efesasí Nanin Banta Ayaino Van Ma Pori Amúkein Baya Ino

¹⁵ Bafan Yisasintá ma ákona e mumunan iyáke monó nanin banta ma minó pimpá ma vain ma avábá iyaona vaya vá iné uno. ¹⁶ Mai van mi séi Tiyarafenu vaípá ena ena susu siantiyáké ákona é timúkuantiyá uno. ¹⁷*Máan tiyá inká tetisi Bafan Yisas Karaisin Afóe ma moéken kakhakhein Tiyarafenu vaípá tiretíi mumunampin kama afova amintin Tiyarafenurá ma mumunan in avúavá kama e afová ono van timúkuantiyá uno. ¹⁸ Máan tiyá inká tiretíi inin ona yiantantiya kama yanasantia ma ameno van dan bain afová ureya mai yanasantia varanté uno sire mairá ákona kaono van mai van deren timúkiyá uno. Mai fara vara seyo, kokhon danasinta ma vei vanasi iyáantán baréin ma amikhein afová ono van muno. ¹⁹⁻²⁰*
*Máan tukhái mai ma minó daná esantaren dan uron bain ákona vaintá ma mumunan iyá tiferuna kéká ano afová ó tifano van mi simúkiyá uno. Mai ákona maen mai ma Yisas Karaisi ma

* **1:14:** 2Ko 1:22 * **1:17:** Kor 1:9 * **1:19-20:** Kor 1:11; Íbo 110:1; 2Ko 13:4; Kor 2:12 * **1:19-20:** Íbo 110:1; 2Ko 13:4; Kor 2:12

furin pintena evaránen avían mantaren kákán bí amiren ma ve ayan kurompá ma yan inarufá bain má manái ukhein ákona ino. ²¹ *Máan tukhein nan mi Yisas Karaisi anon namu aunan kayo ma moékán ákona vain kaylorá dafíken mino. Máan tukhan mi ven aví bá ákona vá anon ánon banta kayo aví bá ákona vá esantakhen mino. Máan tukhein béis ída saréa ana yafisinten mifo ínaimpá deren dafisinten mino. ²² *Tiyarafenu ano minó danáká ma yafisin ákona Yisas Karaisin amikhen mino. Mai monó nanin banta ano mai fintena ayain barano van mi mai ákona amikhen mino. ²³ *Monó nanin banta ma vain mai Yisasin aun ban mino. Máan tukhan mi minó akhempá ma vain danasintafin béis kanai suron ukhen mino.

2

Tiyarafenu Ano Ma Furin Pintena Yisas Karaisi Má Ma Evaránen Tivian Mantein Baya Ino

¹ *Yisas Karaisintá ma gefá ída mumunan ukheya mae Tiyarafenu oo átakharé ureya namu avúavá bariyáke fasen purin nanin banta an mi yakhare ono. ² *Máan ma iyaona anon afokhampin ma namu aunani ánon banta kayo ano ma Ban Anoni oo yaiyení iya va ono. Tiyarafenu oo ma átakharé iyain nanin banta aúpin mai namu aunan manon dafíken doriyán mino. ³ *Máan tiyan mifo Yisas Karaisintá ma gefá ída mumunan ukhé tifé maé teti minó ano yeren

* **1:21:** Kor 1:16; 2:10 * **1:22:** Íbo 8:6 * **1:23:** Rom 12:5;
Efe 4:10, 15; Kor 1:18 * **2:1:** Kor 1:21; 2:13 * **2:2:** Kor 3:7;
Tai 3:3 * **2:3:** Kor 3:6

mai avúavá bariyaré tiféuno. Tetí ankan dere ume avúavá pinté e afoká ukhá é tifékun Tiyarafenu aran naná ano ma minó ena anan nanin bantafin ma erikhá ein mano setimpin má deren erikharen mino.

⁴*Máan tinten mifo mai ma arunaná bíkakhein Tiyarafenu ano setin nan moékantá anunu uren ⁵ tetí ankan ma véin oo átakharé eruna anoi furin nanin banta an dakhá é tifékun mi Yisas Karaisin ma avión mantein manon tetin auyen aunan timen mino. Mai Tiyarafenu anon bei sarisarifó tetin tiya uren evaránen tivíken mino.

⁶*Tiyarafenu ma furin pintena Yisas Karaisin má orun tivíon mantaren maen inarufá ma vain danasintará dafisin nono sen iyátintáken mino.

⁷Yisas Karaisin pintéi uaren Tiyarafenu ano setin tarisari ukhein taréa fi ínaimpa safi mai minó nanin banta anon mai ma minó daná esantakhein danasinta ma aní ukhein onanten mino.

⁸Mai fara vara seyo, Yisasintá ma mumunan eona anarái Tiyarafenu ano vei sarisari fóké tiretin aya uren evaránen avíken mino. Mai sreti ma kama avúavá bariyaona vara máan ten naifo Tiyarafenu ano vei anunurái faran aya uren evaránen avíken mino. ⁹*Tiretí ankan ma kama avúavá manteona vara Tiyarafenu ano aya uren evaránen avíken naifo mana ano ída vá be amo sino. ¹⁰*Mai fara vara seyo, Tiyarafenu ano Yisas Karaisin pinté uaren mi setin kama uren uvamádá bá tiféuno. Mai vará téti nan ma kama avúavá barano van ma fefá iniádan baré ein ná bará tifano.

* **2:4:** Rom 6:11-13 * **2:6:** Kor 2:12 * **2:9:** 1Ko 1:29-31; 2Ti 1:9 * **2:10:** Tai 2:14

*Yisas Karaisin Má Ma Mana Vukhafaí In Baya
Ino*

¹¹ Tiretí ankan ída Yutan kayo ompo ena anan bantafin mi afoká ukha ompo afovasá ono. Máan tukhein nan mi Yutan kayo ano siretin nan ída au kakhein kayo ino siren betí ma yan bukhafa máará kakhein nan mi au khákán iyan mifo aúpin ída funtáken mino. ¹² *Máan tukhen mifo maí damú tiretí ankan ída Yisasini ádé bare ompo ovare vá me ineno. Isarerí nanin banta van ma Tiyarafenu ano vei vanasi e sen avíkeimpín tiretin má maifin ída váke Tiyarafenu ano ma vetin iyántákeimpín ída siretin nina van mino. Mai fara va ino. Tiretí ankan ma ma varafin báke ompo Tiyarafenu ída afová eya inká beni kama yanasinta van ída ákona e ave ukhare ono. ¹³ *Máan tukha ompo Yisasi ma siretin nan e furen ma vei nare vanaein manon tiretin e avíán beni ádé kaen mino.

¹⁴ *Mai fara vara seyo Yisas Karaisi anon tetí Yutan kayo vá inká tireti ena anan kéká bá ma ará kusen manafin ban avúavá timen mino. Mai ma erasampin ma ven ará namu uantan maran iyákun ma mai ano erasan aúbóná ma kákán on kakhá ein mi yo máden mai on evaránen antíkaren erasan maman manafinén mino. ¹⁵*Yutan kayoi man bayafin kokhon bayan baré íkan mi Yisasini furin manon mai vaya kayo yo maman karúdaren Yutan kayo vá ena anan kéká bá e avíán beyantá túpá uren mi maman mana auyen ananíen mino. Míkanan ma ará

* **2:12:** Rom 9:4; Kor 1:21 * **2:13:** Kor 1:20 * **2:14:** 1Ko 12:13 * **2:15:** Kor 2:14

kusen manafin ban avúavá ameno van mi véi máan ten mino. ¹⁶*Béi ma yaa unkamádantá purein manon míkanan anan maman manafiní uran mi vékanan Tiyarafenu vá aronaíen mino. Mai van mi míkan mano ída evaránen ben ará namu uantan maran inten mino. ¹⁷*Yisas Karaisi ano ma ma yarafin eriven tireti ena anan kéká ma Tiyarafenui ádé ída váke nentá ma vaona vá inká tetí Yutan kayo ma Tiyarafenu ádé bá tiferuna vá ano ma kusen bani kama vayan tisimen mino. ¹⁸ Mai fara vara seyo, Yisasin pintéi uaré teti Yutan kayo vá tireti ena anan kéká bá ano kasaé Tiyarafenu avorá ódó tifantékun mai ma varé tiferuna Kantá Aunan manon mai aa aní inten mino.

Tiyarafenui Kantá Namuni Vaya Ino

¹⁹*Máan tukhayán tiretí ena anan kayo ano saréa ída soya nanin banta ma vaonaí ukha ompo sirenín má deren Tiyarafenui vanasi vákeya veni kékasí ukha ono. ²⁰*Máan tukhái setí ankan Yisasin amái vákun mi inká beni kama vaya ma varen orin banta kayo vá sakhanampa vanta kéká bá anon namádantá ukhan inká Yisas Karaisi anon beyantá mai namuni Bafaní ukhen mino. ²¹*Mai setí ankan ma mumunan iyá tiferuna anoi maman manafiní uvéi Bafani kantasí ukhein monó namun ma uvariyá tiféuno. ²²*Máan tukhayán tireti ena anan kéká bá ano yere Yisimpin o asótú uven nan mi sirenín ma maman

* **2:16:** Sek 9:10; Kor 1:20, 22 * **2:17:** Ais 57:19 * **2:19:** Efe 3:6 * **2:20:** 1Ko 3:11 * **2:21:** 1Ko 3:16 * **2:22:** 1Pi 2:5

Tiyarafenui Kantá Aunan ma van namuní iya ono.

3

Pori Ena Anan Kayofin Monó Tiamin Banta Ino

¹*Tiretí ena anan nanin banta aya ono van mi séi Pori ano Yisas Karaisini karavusifin bá uno. ²*Bákun mi siretí ankan ena anan nanin banta ma siamíden tarisari ino van ma Tiyarafenu ano ma simikhein doran inka afová ukha rono. ³*Mai sarisari ma aúpá baréin ma Tiyarafenu ano séin aníí ódaré maé mafefá afova vompon tiretin uvaman amikharé erunan taréa afoká en mino. ⁴Máan tukhein mi mai ma uvaman amikharé eruna vompon ma yankafinteyan Yisasi ma yoriyaré éi pákena ma afová ukheruna mai afová inono. ⁵Pefá Tiyarafenu ano mai aúpá ineine ída vanasifin aníín ontaren mifo saréqan Kantá Aunan tákéi sakhanampa vanta kayo vá inká baya ma varen orin banta kéká bápin mi afokáin onen mino.

⁶*Máan tukhan Tiyarafenui aúpá ineine máan mi ukhen mino. Tireti ena anan nanin banta ano ma mumunan iyaona kéká bá inká Yutan kayo ano ma mumunan ukhein kayo vá ano maman manaí uveyan Yisasin má túpá eonai véin pinté uarei Yutan kayo ma iyáantan baré ein danasinta yaídeya varan nono. ⁷*Tiyarafenu ano séin tarisari uren kama usintáden ákona simikhái veni yoran bantaí ukhé beni kama vaya ma siamin dorarí iyá uno.

* **3:1:** Fir 1:7, 13 * **3:2:** Kor 1:25 * **3:3:** Efe 1:9-10; Kor 1:26

* **3:6:** Efe 2:13, 16-19 * **3:7:** Kor 1:25

8 *Tiyarafenu kama nanin banta an téi ída yakhékun mi Tiyarafenu ano séin tarisari uren mi Yisasín ída kanaíen dosiren kama yanasinta setin timikheií pákena van ma ena anan nanin banta siamin doran téin timikhen mino. **9** Máan tukhan mi minó daná ma uvantein Tiyarafenu ano séin nan bei aúpá ineine ma esé araí in tá baré ein maman dákó ino van mi séin aní uren tivíken mino. **10** Máan tukhan mi véi ma ena anan má Yutan kayo vá ma maman manafiní inain manon bei kama ineine vá afova vá ma ayompin bákan ma ákona ví bá ma vain aunan kayofin afoká inten mino. **11** Pefá ma vara ma ída uvanten maen béis Bafan Yisas Karaisin pinté uaren mai yaná barano van mi iniádákaren baren mino.

12 *Tetí ankan ma véintá mumunañ é tiferuna anon béimpin o asótú uvé tifékun mi mai anon Tiyarafenu vaípá ma orin ona yirá tiféi véin avorá ída feranton oriyá tiféuno. **13** Máan tukhái séi ma kama vaya siamiyarunará ma uman timiyain nan tiretí ena anan nanin banta ano ída anomé iniyáke amusin mana ono van mi ákona é tiamiyá uno.

Pori Ma Efesasi Kéká Ákona Uantano Van Amúkein Baya Ino

14 Mai anarái séi siron kanan durafúdé tiretin nan te Sifóe vaípá timúkiyá uno. **15** Mai fara vara seyo, ma vara ráke yanasinta vá inká inaruráke yanasintará ma ánoní ukhein benafo veyáká anan ban mino. **16** Máan tukhan béimpin moéken avábá bakái veni Kantá Aunan mano siretin ákona amino van mi séi simúkiyá uno.

* **3:8:** 1Ko 15:9-10 * **3:12:** Yon 14:6; Rom 5:2

17*Inká Yisas Karaisintá ma mumunan esin mæn tiretimpin béis vanten mino. Máan tuvinti Ti-yarafenui kama varafin ma amun dan aravuvín mantan ákona einí ono van mi simúkiyá uno.

18 Tiretí ankan má minó Tiyarafenui mumunan nanin banta vá ano Yisas Karaisini ída kípan avábá ma kákání in inká ayasí in dan ódin ma námen aravin ukhein ma afová in ákona varano van mi simúkiyá uno.

19 Yisas Karaisini avábá maen moéken kákán mi vantiya ída kanaíeya minó afová inompo mai finté manáa kokhon afová ono van muno.

Máan tesin maen Tiyarafenui aunan má ákona vá ano saretimpin bíkakhen bano van mi simúkiyá uno.

20 Tiyarafenui ákona ano ma setimpin doriyá ma setí ankan ina ono van ma iniyá tiferuna yanásintai ákona ano moéken esantakhen mino.

21 Máan tukhein nará minó mumunan nanin banta ano Yisas Karaisin táké uaren ná ena ena yamú Tiyarafenun kákán bí amen oríyan ná bano. Pura ino.

4

Yisas Karaisi Má Ma Mana Vukhafaí in Baya Ino

1*Tiyarafenu anon tiretin arakhen mifo mai van inian kákání ono van mi Bafani yorarí ma iyarunará ma fákaan karavusií ukhein banta anon tiretin duvun iyá uno.

2*Ena ena yamú kuse váke vá bempákesá nono.

Tiretíi avábá posá beni uman ayain maran ná ono.

3*Tiretí ákona

* **3:17:** Yon 14:23; Kor 1:23; 2:7 * **4:1:** Kor 1:10 * **4:2:** Kor 3:12-13 * **4:3:** Kor 3:14-15

ure vá Kantá Aunan má o súpá uveya ará kusen ban avúaváposá tiretiyan damono. ⁴ Para vara seyo, mana vukhafa vá mana Aunan mái vákan inká ínaimpáke yanáká ma ákona inin kauren ma avein mai manan bákán mi siretin arakhen mino. ⁵⁻⁶ *Mana Bafan má mana mumunan má mana non baran má inká tetin Tifóe mana Tiyarafenu vá anan ban mi minó tetimpin doriyáken minó esantakhen mino.

⁷ *Máan tukhen pasen mi Yisas Karaisin pinté uaren minó nanin banta avábá uren mana mana amusin daná amirú amirú ukhen mino. ⁸ Máan tukhein nan mi Tiyarafenui vompon dóki ano máa sikhen mino.

“Béi ma inarufá ódiyáken maen
bei vanasi ma karavusií ukhá ein iyanen ben
oyampá oriyan
maen mana yaná amusin amirú en mino. *Íbo 68:18*

⁹ *Mai ma véi yan ódé uno ma sein bayai ana máan mi ukhen mino. Ma ma seti varuna varafin béis veyan maman bararasí uren erakharen mi evaránen ódikhen mino. ¹⁰ Mai ma veyan maman bararasí uren erakhá ein mano anan minó danápin béis yafisin mano víkano van ayompin ma vain danasinta esantaren dan uron ódikhen mino. ¹¹ *Béi anon monó nanin banta amusin amen mi manáa avían aposeriien inká manáa avían sakhanampa vantaíen inká manáa avían monó nanin bantará dafisinien mi inká manáa avían monó baya ma siamin bantaíen mi inká manáa avían monó afova ma amin bantaí urú

* **4:5-6:** 1Ko 12:6 * **4:7:** Rom 12:3, 6 * **4:9:** Yon 3:13

* **4:11:** 1Ko 12:28

en mi ukhen mino. ¹² Máan tukhan mi vetíi yoran ma vain mai Tiyarafenu vanasi ayaintin beni yoran doriyáken monó nanin banta ano ma Karaisin au vukhafaí ma ukhein mai ákonæn báken kamaen bano van mino. ¹³*Máan té oriyá tifé ma setisi mumunan má afova vá ma o éke e éke uan Tiyarafenu Anintá kauré ma sirá manafiní uré tifé ma Bafan oman tapé tiyá inká monó tin avúavápin ma mantaan ákona uvé maé Yisas Karaisi ma kama avúava sintá ma variyá einí ó tifanté uno.

¹⁴ Máan tuvé maé ída evaráné arará iyampon kayo an davé kampun banta kékái vaya van puran tiyan mantino siré e mumunan uan more mere ó tifanté uno. Mai fara vara seyo, manáa kéká ano kampun bayá fóké dákói fura vaya ma seiní iyáken tetin máka siyan mino. ¹⁵*Máka sinten mifo seti monó nanin banta ano vá tetisi ánon ma Yisas Karaisi vaká ma ven au an ma yakhé tiferuna kéká ano vá beni avúavá moéché bariyákesá pura vaya vá avábá basá pákaan ákona ó tifano. ¹⁶ Máan tukhé tifékun mi véi anon minó bukhafa maman manará asótú uran kamaen báken bei yorarí urú iyáken mi ena vukhafa aya íkan inoriyan mairái minó bukhafa ano kama ukhen avábápin inoriyan mino.

Kakhan Avúaváká Ma Vain Iyamporinta An Ma Yakhen Ban Baya Ino

¹⁷*Máan tukhein nan mi Bafani ákonorá tiretin ma vaya siamiyá uno. Monó ma ída inin nanin bantai avúaváká ída vá nono. Mai fara vara seyo,

* **4:13:** Kor 1:28 * **4:15:** Kor 1:18; 2:19 * **4:17:** Rom 1:21;
1Pi 1:14

vetíi inin asuse uron mi ukhen mino. ¹⁸ Betíi inin maen titípa an mi yakhan pasen Tiyarafenui avúavápin nenta suron mi van mino. Mai fara va ino. Betíi inin mano nenta suron bákán aú ano ákona ukhen mino. ¹⁹ Máan tukhan pasen betíi ineine finté kama inin oriyin maen moéken namu avúavápin oferan namu ineine kayo anan bíkakhan pasen kasaen ara ara avúavasí é iyan mino.

²⁰ Máan té iyan mifo saretí ankan mai aa sákesa Yisas Karaisin afová ukhe va ono. Ída ino. ²¹ Yisasin pinten mai fura vaya inirei véin afová eono. ²²*Pefá tiretí ankan má deren mai ma kampun tin avúavá bá inká ará mantan ma namu avúavá barampin má bare ompo saréa mai avúavasá oyan ameno. Mai fara vara seyo, mai avúavá anon kampun tireya vanasii ineine máde asuse uantiyare ono. ²³*Máan ma iyá eona vará monó avúavápin tiretí ineine vasá maman auyení ono. ²⁴*Tiretí ankan auyen nanin bantaí ukha ompo auyen avúavá sá aní ono. Mai fara vara seyo, Tiyarafenu ano maman beyan an mi yara vaompo funtákein nanin bantaí ukheya kantasí ukhe fura yaná ana vá barano.

²⁵*Mai vará kampun tin avúavá ifa ureya vá pura sikhein baya ana vá ben tiamin maran ono. Mai fara vara seyo, setí mana vukhafa finté nan bá tiféuno. ²⁶*Tiretí ankan umeí inampo ída vá áesin arankan avúavá ano saretintá dafisino. *Íbo 4:4*

* **4:22:** Rom 8:13; Kor 3:9 * **4:23:** Rom 12:2 * **4:24:** Esé 1:26; Kor 3:10 * **4:25:** Sek 8:16; Kor 3:8-9 * **4:26:** Yem 1:19-20

Ída vá aran nan iya vasin ná áau eraven orun perano. ²⁷ Mai fara vara seyo, aran nan ma in avúavá anon Ban Anoni ona yiantan nono.

²⁸ Umoyan ma iyá inona kéká ano mai avúavá ifá ure vá tiretí ayampó pura se kama yorarí ureya kokhon daná máde vá o ma afasí ukhein nanin banta siretí aúkáke sá aya ono. ²⁹ *Tiretí ankan oorá dafíke ída vá namu vaya kayo seno. Ena nanin banta ma aya oren baya kayo ana siyasin ná mai vaya ma inin nain kayo aya ino.

³⁰ *Tiyarafenu ano siretin evaránen miyaní uren maen bei Kantá Aunampó tiretin aníen be ina e sikhen mifo ída vá tiretíi avúavá ano Kantá Aunan arunaná amino.

³¹ *Máan tinona van mi ena asiren ma ará namu uantan avúavá bá aranan in má baé naé tin má oyampá baya sin má inká namu avúavá sintá vá ampeno van tiyá uno. ³² *Ampire vá tiretí ankan ben kama uren ará amin maran iyákeyá vá Tiyarafenu ano ma Yisas Karaisin pinté uaren ma siretí ume ampianteiní eya vá enai ume ampiantano.

5

Kakhakheintá Ma Van Baya Ino

¹ *Tiretí ankan ma minó danasí inte mae mai Tiyarafenui avúavá ánaín ná bákurono. Mai fara vara seyo, siretí béis akhafanan ban nan tireti nan anunu ukhen mino. ² *Yisas Karaisi

* **4:29:** Kor 4:6 * **4:30:** Ais 63:10; Efe 1:13-14; 1Te 5:19

* **4:31:** Kor 3:8 * **4:32:** Mat 6:14; 18:22-35; Kor 3:12-13 * **5:1:**

Mat 5:48 * **5:2:** Eks 29:18; Ibu 10:10

ma siretin nan anunu uren ma vei aufó ákonte uran Tiyarafenu avorá aunka uveri an dákan ma amusin uaren tiretí ume ampianteiní e vá ena ma anunuin avúavá áesin ná tiretimpin bíkakhanti vá bano.

³ Máan tukhanti ída vá pamúku avúava safi ena ina yaná ma aranan nafi ena namu avúava sintá fi vá barano. Mai fara vara seyo, Tiyarafenui vanasifin máan avúavá ma variyain kayoi afokhan ída van mino. ⁴ Tiretí ankan Tiyarafenu vá tusu siantan nompo ída vá namu vaya fi aniana vaya fi inká namu vaya fo safi vá taró teno. ⁵ *Para vara seyo, sretí ankan afovasá ono. Pamúku avúava safi inká ída funtákein avúava sintá fi ena ina yaná ma aran nan nafi ma variyain mai kampun ayarafenu kayoi monó tiantiyain pasen máan nanin banta ano ída kanaíen Yisas Karaisin má Tiyarafenu vái yafisimpin orinten mino. ⁶ *Kampun banta kayoi vaya inire vákurin nampo yafían ná ákoná oro. Mai fara vara seyo, namu avúavá ma variyá inain nanin banta amaninái Tiyarafenui aran naná afoká inten mino. ⁷ Máan tukhanti mai ma vanasi ano ma namu avúavá baran naimpin ída vá o fébe varano.

⁸ *Mai fara vara seyo,fefá titípafin baré en nan mi saréa Bafan mano avían kakhanntá kaúken mifo kakhan avúavá kasá bano. ⁹ Mai fara vara seyo, mai khakhan ma sretimpin bain manon kama avúavá bá puntákein avúavá bá inká pura sin avúavá bái maman dákó é iyan mino.

* **5:5:** 1Ko 6:9-10; Kor 3:5 * **5:6:** Rom 1:18; Kor 2:4, 8 * **5:8:**
Yon 12:36; Efe 2:13; Kor 1:13; 1Pi 2:9

10 Máan tukhein nará Bafan mano ma amusin oren ukhein avúavasá dosireya afová oro.
11 Namu avúavá ma variyain nanin banta vá ída vá avunteé ono. Mai avúavá sintá ano ída kama aran imadé iyan mino. Máan tukhein nará mai avúavá sintá vará antan nono. **12** Mai fara vara seyo, ume nanin banta ano ma aúpáké bariyain avúavá ma yákó tian amáin nan tiyave inten mino. **13** *Máan tiyan mifo oon mano ma vetimpin panu sin maen namu avúavá sintá maman afoká é iyan mino. **14** *Para vara seyo oon mano ma kamaen panu sin maen minó daná maman dákó é iyan mino. Mai van mi máa sikhen mino.

“Aun ma vakheona kéka soe, mantano.

Púkanona finté orun mantesin ná
 Yisas Karaisi ano kakhaantano.”

Kantá Aunani Ákonará Ma Van Baya Ino

15 *Máan turanti saretí ma vanonafin dafíon ná ákona ukhe vano. Kama ineine ma vákan bain nanin banta an ná dakheya ída vá aniana ma ukhein nanin banta an dano. **16** Taréa namu yamúi va ompo yafíon ákona ukheya ena ena kama avúavá ana vá barano. **17** Mai van ída vá aniana iya váke Bafan mano intéa yanásá barano van anunu ukhen nafi mai yanásá afová ono. **18** *Mai namu avuává ano saretí van máden asuse inten mifo ída vá óen non nare óen iya vano. Áesin ná Kantá Aunan mano vá tiretimpin bíkakhanti vá bano. **19** *Banti vá Í Bompon

* **5:13:** Yon 3:20-21 * **5:14:** Ais 26:19; Rom 13:11 * **5:15:**
 Kor 4:5 * **5:18:** Ruk 21:34 * **5:19:** Kor 3:16

pintena í bá ena í kayo vá inká Kantá Aunan mano ma inimpin báuantan nain í kayo vá ben tiamin maran iya vá tiretí aúkáké Bafantá í dano.

20 *Máan tiya mae minó danasinta vará tetisi Bafan Yisas Karaisin avíkasá ena ena yamú tiretin Afóe Tiyarafenun ná tusu siantano.

Ábasu Ano Ma Kamaen Ban Avúavá Baya Ino

21 *Tiretí ankan Karaisin aránaópá báke vá ena nanin banta vá oo yaiyin maran ná ono.

22 *Bafani aránaópá ma vaonaí eya sireti anasi kayo ano sretí avafuná aránaópasá bano.

23 *Mai fara vara seyo, Yisas Karaisi ma monó nanin banta ánon báken ma ve au fóké aya uren ma evaránen avíkeinien mi vanta anon be anái ánon ban mino.

24 Monó nanin banta ano ma Yisas Karaisini aránaópá bainí eya vá tiretí anasi kayo ano vá avafuná aránaópasá bano.

25 *Inká avafuná ano vá Yisas Karaisi ma monó nanin banta van ma anunu uren aya ono van ma vei aunan ampikheiníe vá tiretí anáona vará anunu ono.

26 *Banasi maman kantasí ono van mi Yisas Karaisi anon non má Tiyarafenui vayafo bái vei vanasi sesé uran mi ven avorá kamaen kantasí ukhen mino.

27 *Béi ma máan tein mai ve avorá maman avusese en kama urantin pain nafi sonton nafi ída vantin bei vanasi ano ída aau vantin kantasí ana ukhen bano van mino.

28 Máan mana en ná avafuná ano ma vetíi au van ma anunu iyainien ná betí anáona vará anunu

* **5:20:** Kor 3:17 * **5:21:** 1Pi 5:5 * **5:22:** Kor 3:18; 1Pi 3:1
 * **5:23:** 1Ko 11:3; Efe 1:22 * **5:25:** Kor 3:19; 1Pi 3:7 * **5:26:**
 Tai 3:5 * **5:27:** 2Ko 11:2; Kor 1:22

ino. Mai fara vara seyo, avafu ano ma ve ana san ma anunu inten mai fura sen beyan nan mi anunu iyan mino. ²⁹ Yisas Karaisi ma ve au an dakhan ma monó nanin banta van anunu iyainié mana vanta ano ída vei au van oman kaumpán é iyan mifo kama uren mi yafisé iyan mino. ³⁰ Máan tukhái setí ankan Yisas Karaisini au vukhafan bá tiféuno.

³¹ *Tiyarafenui vompon dóki ano máa sikhen mino. “Mai van mi vanta ano ve anóe afóen me ampiren be aná bá o súpá en mana vukhafai é iyan mino.”

Esé 2:24

³² *Mai vaya anon moéken kákani suron ukhen mifo Yisas Karaisi ma monó nanin banta vá man mana vukhafai ukhei pákena vayan tiádan ban mino. ³³ Máan tukhein nan mi siretin evaráné tiamé uno. Mana mana vanta ano ma eyan nan ma anunu iyaonaí eya vá e aná anunu ono. Inká anasi ano vá be avafuni aránaópá báke ná ben oo yaiyino.

6

Anóe Afóen Má Iyamporinta Vái Vaya Ino

¹ *Iyamporinta oe, Bafan mái súpá ukha ompo anóe afóni oo vá daiyono. Mai fara vara seyo, máan ma inteya mai kamaen puntákein avúavá baran nono. ² Tiyarafenui siyan míkan man baya kayo finté ma esé iyáantán ma vain man baya ano máan mi sikhen mino. “Tiretí anóe afóeni aránaópasá bákeya vetin oo vá daiyono.” ³ Mai ma iyáantán baya ano máan mi sikhen mino.

* **5:31:** Mat 19:5 * **5:32:** Rev 19:7 * **6:1:** Kor 3:20

“Tiretí anóe afóen aránaópá báke ma vetin oo yaiyinte mai kama e ma varará ayáká ban nono.”

Diu 5:16

⁴*Inká tiretí afóe yan noe, ída vá iyampon kayo ma aran amin avúavá bariyákeya vetin kama uantádeya vá Bafani kama avúavá sintá vá afova ameno.

*Miyan Ída Van Doran Banta Kayo Vá Ayafa
Kéká Báí Vaya Ino*

⁵*Miyan ída van doran nanin banta oe, Yisas Karaisini oo yaiyono van ma iyaonaí eyá tiretíi ayafa aránaópá bákeya vetin ma sin nain dorarisá ono. ⁶Tiretíi ayafa kayo ano ma sirenín ádé ban nain damú ana ídq vá betin amusin ameno van ákoná yorarí ono. Ída ino. Yisas Karaisini miyan ída van doran nanin banta ma vanteya aúkáke sa Tiyarafenui anunu vákurono. ⁷Bafan mano amusin ino van muno sire vá amusin iyákeya aúkáke sa minó doran dorano. ⁸*Máan tukhein nan mi miyan ída van doran nanin banta fu inká miyan ban doran banta fu mai ovaresá me iné tifano. Tetí ma kama yorarí ukhá onunarái siyan Bafan mano miyan timirú inten mino.

⁹*Inká tireti ayafa vanta kayo oe, sirenín miyan ída van doran nanin banta kayo ída vá akhokho amiyákeya vetin kama uresin ná ban. Ovare vá me ineno. Betí má tirétí míái Kákán mai inarufái váken bái ída mana van mana anunu é iyan mino.

Tiyarafenui Aruvín Danasinta Fákena Vaya Ino

* **6:4:** Íbo 78:4; Pro 22:6; Kor 3:21 * **6:5:** Kor 3:22-23; Tai 2:9-10; 1Pi 2:18 * **6:8:** 2Ko 5:10; Kor 3:24-25 * **6:9:** Rom 2:11; Kor 4:1

10 Tesi kípan baya ino. Bafani kákán ákona vasá mantaan ákona ono. **11** *Tiyarafenui minó aruvín buí daná ma ureyan kasae mantaan ákona uve mae Ban Anoni máka simpin esantan nono. **12** *Mai fara vara seyo, varará nanin banta vá ída siruviyá tifé umpo namu aunani ánon banta kayo vá ma varará ma yafíkein namu aunan kayo vá inká titípa avúavá bá ayompin ma namu avúavá bariyain aunan kayo vái siruviyá tiféuno.

13 Máon tukhein nan Tiyarafenui minó aruvín buí daná urákareya namu yamú ma erintiya kasae mantakhare vá inká aruvín ma kípavinti yere mantaan ákona ukhe vano. **14** *Mantaan ma ákona ono ma sinteya fura vaya ana ma simpo sá amú ananí eya vá Tiyarafenui funtákein avúavápó kápá ona ma uan ákorá iyareinisá ono. **15** *Inká Tiyarafenui kama vaya finté ma eriyain kusin baya fosá arantan anamun an dareya fura se útare vá bano. **16** Mai aruvín danasinta ma variyákeya inká mumunan ná pákāan ákona uresin ná mai ano sanko an davintin ná Ban Anoni ira khiyain uve kayo ano e khútino. **17** *Máon tiyantiya vá inká Tiyarafenu ma siren tin evaránen avíkein inin mano vá kápá kamamó ma einí uvintiya vá inká Tiyarafenui vaya fosá maman Kantá Aunani vaenatií ure vá pákāan ákona ono. **18** *Kantá Aunani ákona rasá ena ena yamú amúkiyáke vá ákona e Tiyarafenu tiamesin ná tiretin aya ino. Ena ena yamusá minó

* **6:11:** Rom 13:12; 2Ko 10:4 * **6:12:** 1Pi 5:8-9 * **6:14:** Ais 11:5; 59:17; 1Te 5:8 * **6:15:** Rom 10:15 * **6:17:** Ibu 4:12

* **6:18:** Ruk 18:1; Kor 4:2; 1Te 5:17

akhempá ma vain monó nanin banta van iniya vá amúkuantano.

19 *Máan tiyákeya Tiyarafenui kama vaya ma vain mai ena anan nanin banta ina vá dere ifo vá amúkusintiya sirá beni aúpá ineine ída feran kamaesá tian amá uan ameno. **20** *Mai fara vara seyo, séi Tiyarafenui oo vantán bákéi mai vaya ma siyaruna anarái siyan tirantantá seni anan kukhen mifo amúkusintiya sirá ída feranton kasaé beni vaya sian amá ono.

Pori Ma Kípiyan Amusin Baya Sein Mino.

21 *Tikikasi maen téin tinunu ukhein tifá tiváen báken tiyaen Bafani ákona yorarí iyain bantin téi ma variyaruna fáké baya sian amá intiya inin nono. **22** Mai van mi sretin ákona uantan baya siamiyáken inká teti ma varuna fáke yere siamino van mi véin tiantékun tireti vaonafá orinten mino.

23 Mumunan tiyofi sifá tiváeyan noe, seti Sifóe Tiyarafenu vá Bafan Yisas Karaisin má anon tiretin nan anunu uren ará kusiantáden mumunan ákona uantanten mino. **24** Mai ma setisi Bafan Yisas Karaisin nan ma aúkáké anunu iyain kayofin ná Tiyarafenui sarisari ano vano.

* **6:19:** Kor 4:3-4; 2Te 3:1 * **6:20:** 2Ko 5:20; Frm 9 * **6:21:**
Apo 20:4; Kor 4:7-8; 2Ti 4:12

YISASINI KAMA VAYA
The New Testament in the Agarabi language of Papua
New Guinea
Nupela Testamen long tokples Agarabi long Niugini

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

PDF generated using Haiola and XeLaTeX on 21 Feb 2024 from source files
dated 31 Aug 2023

105c264e-e2fa-503a-9726-8b662c09b700